

22/12/2003

8,000 banjiri Galeria Sri Perdana

KUALA LUMPUR: Lebih 8,000 orang mengunjungi Galeria Sri Perdana yang pernah menjadi kediaman rasmi Tun Dr Mahathir Mohamad, pada hari pertama ia dibuka kepada orang ramai, semalam.

Galeria yang diwujudkan bagi memperingati dan mengenang sumbangan Dr Mahathir sepanjang 22 tahun berkhidmat sebagai Perdana Menteri itu, dirasmikan Perdana Menteri Datuk Seri Abdullah Ahmad Badawi, kelmarin.

Pengunjung yang ditemui berpendapat galeria berkenaan membolehkan rakyat mengenali kehidupan Dr Mahathir sebagai Perdana Menteri sebelum bersara 31 Oktober lalu.

Seorang suri rumah, Faridah Abdul Razak, 56, berkata penubuhan galeria itu dapat mengimbas kembali jasa dan pengorbanan Dr Mahathir terhadap negara.

"Saya datang dari Jelebu, Negeri Sembilan, semata-mata untuk mengunjungi galeria ini.

"Galeria ini adalah landasan terbaik menghargai perjuangan dan jasanya kepada negara, selain memaparkan beliau negarawan terulung," katanya yang datang bersama keluarga.

Anaknya, Hamdan Mohd Darus, 34, berkata mereka sekeluarga kagum dengan kepimpinan Dr Mahathir yang membawa Malaysia menjadi sebuah negara yang disegani dunia.

"Walaupun tidak dapat mengenalinya secara dekat, sekurang-kurangnya galeria ini mendekatkan kami kepada beliau," katanya.

Sebelum ditukar menjadi Galeria Sri Perdana, bangunan di Jalan Damansara itu adalah kediaman rasmi Dr Mahathir sekeluarga dari 23 Ogos 1983 sehingga 18 Ogos 1999 sebelum berpindah ke kediaman rasmi baru Perdana Menteri di Putrajaya.

Lai Sek Li, 23, pula menganggap Dr Mahathir seorang pemimpin yang banyak berbakti kepada negara dan pengorbanannya wajar dihargai rakyat.

Burhanudin Abdullah, 26, pula berkata Dr Mahathir banyak membawa perubahan kepada negara sehinggakan Malaysia dikenali di seluruh dunia.

"Banyak yang dilakukannya seperti pembinaan Menara Berkembar Petronas dan Litar F1 yang tidak pernah terfikir kita untuk membinanya," katanya.

Galeria Sri Perdana dibuka setiap hari kecuali Isnin, dari jam 10 pagi hingga 5 petang.